

Viver e laschar viver er en chaussa rg

Sesida da la Gruppa rumantscha dal cussegl grond

■ **(anr/fa) Tar la grcg existan duas posiziuns, ils ins vulan introducir rg plainamain en scola, ils auters mo passivamain sin il stgalim superiur. La gruppa è da l'avis ch'ins duessia laschar decider mintga vischnanca sezza.** Sesida serrada, avevi num mardi saira per ils represchentants dals meds da massa: En l'Hotel Staila a Cuira s'avevan chattadas las 33 commembras e commembers da la Gruppa rumantscha dal cussegl grond (grcg) per discussiunar il tema rumantsch grischun (rg) ed ils meds d'instrucziun. Preschents a la discussiun eran er cusseglier guvernativ *Martin Jäger*, ils dus presidents da la Pro idioms *Domenic Toutsch* per l'Engiadina e *Heinrich Berther* per la Surselva e represchentants da la Lia Rumantscha. Suenter duas uras discussiun

s'ha rivì l'isch dal local da sesida. *Jon Domenic Parolini*, il president da la grcg, ha infurmà.

«Instanzas politicas per il mument cuntraproductiv»

Da la discussiun intensiva èsi tenor el resultat che tut ils commembers èn da l'avis che la tematica «rg en scola» saja da gronda impurtanza per ils uffants rumantschs: «Nus tuts avain la finamira da mantegnair il rumantsch cun procurar per ina buna instrucziun da rumantsch en nossas scolas», ha ditg Parolini. Ils ins dals deputads sajan da l'avis ch'ins possia far quai cun introducir il rg gia sco lingua d'alfabetisaziun, ha'l cuntinuà, «ils auters però teman ch'ils uffants fissan surdumandads cun vegnir confruntads en l'emprima classa gia cun duas varian-

tas dal rumantsch.» La grcg ha perquai decis da cuntinuar cun la discussiun gia a chaschun da la proxima sessiun ed en il decurs da quest onn per chattar ina soluziun en chaussa che satisfa a tut las deputadas e tut ils deputads rumantschs. «Fintant che la gruppa nun è dal medem avis fissi cuntraproductiv da vulair far instanzas politicas en il cussegl grond en chaussa rg u idioms», ha menziunà il president da la grcg. Unidamain ha la gruppa finì la discussiun cun la devisa «viver e laschar viver»: «Quels che tschernan rg en scola primara duessan far quai, ils auters duessan examinar pussaivladads da mantegnair l'instrucziun en ils idioms ed ev. introducir il rg passivamain sin il stgalim aut.»

«L'art da chattar ina soluziun acceptabla per tuts»

Cusseglier guvernativ *Martin Jäger* ha ditg ch'el saja suenter questa discussiun animada optimistic: «Era sche las opiniuns èn divergentas exista la voluntad da chattar cuminaivlamain ina soluziun en chaussa.» I vegnia ad esser l'art da la politica da suttemetter al cussegl grond ed a la regenza ina proposta che chatta maioritads, ha'l menziunà. Quai na fiss tenor el betg il cas sch'ins fashess la pretaisa da stampar tut ils meds d'instrucziunuspè en tut ils idioms. La maiortad da las vischnancas han l'idiom sco lingua d'instrucziun principala. «Uss èsi da chattar modas e manieras per evitar ch'ils uffants sajan surdumandads cun duas variantas dal rumantsch», ha ditg il minister da l'educaziun, «la finamira duai esser ch'ils uffants na perdian betg il plaschair per la lingua rumantscha e ch'els sappian a la fin da la scola rumantsch.»



Jon Domenic Parolini presidescha la gruppa rumantscha dal cussegl grond, la quala ha 33 commembers.

FOTO F. ANDRY